

Venres, 22 de maio de 2026

Núm. 96

# ADMINISTRACIÓN LOCAL

## MUNICIPAL

### VIGO

#### Subvencións e axudas

#### *BASES REGULADORAS E ANEXOS DAS SUBVENCIONS A ENTIDADES DEPORTIVAS SEN ANIMO DE LUCRO PARA A PROMOCIÓN DO DEPORTE FEMININO DO ANO 2026*

A Xunta de Goberno Local do Concello de Vigo, na sesión ordinaria do 15 de maio de 2026, acordou, entre outros asuntos, aprobar as seguintes bases e os seus anexos:

#### *BASES REGULADORAS E ANEXOS DAS SUBVENCIONS DO SERVIZO DE IGUALDADE A ENTIDADES DEPORTIVAS SEN ANIMO DE LUCRO DO CONCELLO DE VIGO PARA A PROMOCIÓN DO DEPORTE FEMININO DO ANO 2026*

#### EXPOSICIÓN DE MOTIVOS

##### I

O deporte é un pilar básico para a saúde e o benestar, tanto físico como psicolóxico, que potencia a estima das persoas que o practican e o coñecemento do seu propio corpo, motivando un estilo de vida con hábitos saudables. Así mesmo, o deporte é un medio para afirmar a personalidade dun xeito integral, que lle aprende a quen o practica cualidades como o liderado, a autosuperación, o compañeirismo e a autoestima. O deporte tamén é un espazo socializador que axuda na prevención de prácticas discriminatorias e violentas e a súa práctica, en igualdade de condicións para as mulleres e os homes, repercute nunha sociedade máis igualitaria.

Porén, a participación das mulleres no ámbito deportivo foi tardía e, aínda hoxe, a súa presenza é menor en case todas as modalidades da práctica recreativa, competitiva e/ou profesional, así como en todas as estruturas que conforman o sistema deportivo.

O Anuario de Estadísticas Deportivas 2025, que é unha publicación elaborada pola Subdirección Xeral de Estatística e Estudos do Ministerio de Educación, Formación Profesional e Deportes, recolle unha selección dos resultados estatísticos máis relevantes do ámbito deportivo elaborados a partir das múltiples fontes estatísticas dispoñibles. O Anuario é unha ferramenta útil para o coñecemento da situación do sector deportivo en España e da súa evolución. Estes son algúns dos resultados máis significativos:

#### *Emprego vinculado ao deporte*

A Enquisa de Población Activa, estatística oficial pertencente ao Plan Estatístico Nacional elaborada polo Instituto Nacional de Estatística, permite estimar o emprego en determinadas actividades económicas e ocupacións vinculadas ao deporte.



Venres, 22 de maio de 2026

Núm. 96

Os datos medios do ano 2024 indican que existen diferencias significativas por sexo entre o emprego vinculado ao ámbito deportivo e o emprego total: no emprego vinculado ao ámbito deportivo o 59,8% son homes mentres que no conxunto do emprego a porcentaxe de homes é do 53,6%.

### *Deporte Federado*

Os principais resultados da Estatística de Deporte Federado, elaborada polo Consello Superior de Deportes coa colaboración da Subdirección Xeneral de Estatística e Estudos do Ministerio de Educación, Formación Profesional e Deportes e das federacións deportivas españolas, indican que, no 2024, o 75,1% das licenzas federadas corresponden a homes e só o 24,9% a mulleres.

Polo que respecta aos/ás Deportistas de Alto Nivel (DAN), no ano 2024, o 59,0% dos deportistas de alto nivel son homes e o 41,0% son mulleres.

### *Formación do persoal adestrador*

A Estatística de Formación de Persoal Adestrador Deportivo elaborada polo Consello Superior de Deportes coa colaboración das federacións deportivas españolas e das comunidades e cidades autónomas, ofrece información relativa á formación realizada polas federacións deportivas ou polas administracións autonómicas competentes en materia de deporte. Esta formación é diferente das ensinanzas deportivas oficiais do sistema educativo.

O número do persoal adestrador formado no ámbito estritamente federativo durante o ano 2023 foi de 8.817: o 71,4% son homes e o 28,6%, mulleres.

Polo que se refire ás formacións promovidas pola administración deportiva das comunidades ou cidades autónomas, durante o 2023, o número de persoal adestrador formado foi de 4.919: o 60,2% son homes e o 39,8%, mulleres.

### *Hábitos deportivos*

A Enquisa de Hábitos Deportivos en España 2024/2025, elaborada polo Ministerio de Educación, Formación Profesional e Deportes e o Consello Superior de Deportes coa colaboración do Instituto Nacional de Estatística, e que pertence ao Plan Estadístico Nacional, mostra que a práctica deportiva, independentemente da frecuencia, continúa sendo superior nos homes con respecto ás mulleres, situándose en términos anuais en 66,2% e 59,5%, respectivamente.

A enquisa tamén proporciona indicadores relativos á idade de inicio da práctica deportiva: o 59,4% da poboación que practica deporte iniciou esta actividade antes dos 15 anos. Por sexo, o 70,5 % dos homes comenzaron a facer deporte antes dos 15 anos fronte ao 47,7 % das mulleres.

### *Campionatos universitarios e en idade escolar*

A Explotación da Base de Datos de Campionatos de España Universitarios e en Idade Escolar, pertencente ao Inventario de Operacións Estadísticas da Administración do Estado, permite dispoñer de determinados indicadores relativos á participación e aos resultados neste ámbito. Os resultados relativos a 2024 indican que:



Venres, 22 de maio de 2026

Núm. 96

En canto aos Campionatos de España Universitarios, o número total de deportistas participantes alcanzou os 5.402: 2.914 homes, o 53,9%, e 2.488 mulleres, o 46,1%.

Nos Campionatos de España en Idade Escolar, o número total de deportistas participantes foi de 11.406: 5.902 homes, o 51,7%, e 5.504 mulleres, o 48,3%.

Con respecto á nosa Comunidade autónoma, segundo o Instituto Galego de Estatística, no ano 2024, do total de 301.028 licenzas deportivas, 224.464 pertencen a homes e 76.564, a mulleres, o que supón o 74,6% e o 25,4%, respectivamente.

As porcentaxes de participación das mulleres e nenas nas entidades deportivas da cidade de Vigo son semellantes ás de Galicia e de España. Segundo os datos obtidos do Informe de impacto de xénero sobre o proxecto de orzamentos do Concello de Vigo para o ano 2026 do Servizo de Deportes:

- Na convocatoria de subvencións a entidades deportivas, do total de 24.291 licenzas valoradas, só 6.564 pertencen a deportistas femininas (o 27,03%).
- No programa municipal de escolas deportivas participaron 2.383 escolares femininas dun total de 5.240, o que supón o 45,47%.
- Nas subvencións orientadas a deportistas de alto nivel da cidade de Vigo, só se beneficiaron 15 deportistas femininas dun total de 43 deportistas.

Tamén é salientable a menor repercusión que teñen nos medios de comunicación a participación deportiva e os logros conseguidos por mulleres ou nenas deportistas. As competicións masculinas adoitan contar cun maior impacto social e con máis recursos e interese que as femininas. Esta invisibilización repercute de forma negativa na percepción das deportistas sobre a súa práctica deportiva, na afluencia de público ás competicións femininas e no acceso das entidades deportivas con licenzas femininas ao financiamento. Ademais, o feito de ter menos referentes de mulleres deportistas reflectidas nos medios, un dos principais axentes socializadores, obstaculiza o acceso das nenas e mulleres á práctica deportiva.

Estes datos apuntan a que, a pesar dos avances, prevalecen desequilibrios importantes por razón de sexo no deporte, tanto na súa práctica como na participación en directivas de federacións e entidades deportivas ou, mesmo, no eido profesional, e avalan a necesidade de establecer políticas públicas para corrixir esa situación de desigualdade e para fomentar o acceso, a permanencia e a promoción das nenas e mulleres no ámbito deportivo.

## II

O artigo 25.2 da Lei 7/1985, do 2 de abril, reguladora das bases do réxime local, establece que o Municipio exercerá en todo caso como competencias propias, nos termos da lexislación do Estado e das Comunidades Autónomas, entre outras, nas materias de promoción do deporte e de promoción da igualdade entre homes e mulleres, así como contra a violencia de xénero.

Na mesma liña, a Lei 5/1997, do 22 de xullo, da administración local de Galicia, dispón, no seu artigo 80.2, que o municipio exercerá, en todo caso, competencias, nos termos da lexislación



Venres, 22 de maio de 2026

Núm. 96

do Estado e da Comunidade autónoma, entre outras, nas materias de actividades deportivas e de execución de programas propios destinados á muller.

Así mesmo, a Lei orgánica 3/2007, do 22 de marzo, para a igualdade efectiva de mulleres e homes, imponse aos poderes públicos que establezan medidas explícitas e accións positivas para acadar a igualdade real e efectiva entre mulleres e homes e fai referencia ao ámbito do deporte. O seu artigo 29 establece que “todos os programas públicos de desenvolvemento do deporte incorporarán a efectiva consideración do principio de igualdade real e efectiva entre mulleres e homes no seu deseño e execución”, e que “o Goberno promoverá o deporte feminino e favorecerá a efectiva apertura das disciplinas deportivas ás mulleres, mediante o desenvolvemento de programas específicos en todas as etapas da vida e en todos os niveis, incluídos os de responsabilidade e decisión”.

Como normativa específica da Comunidade autónoma galega cómpre mencionar:

- A Lei 7/2023, do 30 de novembro, para a igualdade efectiva de mulleres e homes de Galicia. O seu artigo 71 establece que a Administración autonómica promoverá a igualdade entre mulleres e homes na actividade deportiva, favorecerá a apertura efectiva de todas as disciplinas deportivas ás mulleres, visibilizará os referentes femininos en todo tipo de deportes e potenciará o pluralismo deportivo e os eventos nos que participen mulleres.
- A Lei 3/2012, do 2 de abril, do deporte de Galicia. O seu artigo 3.b) establece como principio reitor da Lei “o dereito de todos os cidadáns a coñecer e a practicar deporte de forma libre, voluntaria e democrática, en termos de igualdade e sen discriminación algunha” e o artigo 5.3 dispón que “no exercicio das competencias atribuídas á Administración autonómica, integrarase a dimensión da igualdade de oportunidades entre as mulleres e os homes e evitárase calquera elemento de discriminación directa ou indirecta”.

O V Plan integral de Igualdade de Oportunidades entre mulleres e homes da cidade de Vigo 2026-2030, aprobado pola Xunta de Goberno Local na sesión ordinaria do 6 de febreiro de 2026 e ratificado polo Pleno do 23 de febreiro de 2026, establece, entre os seus obxectivos xerais, fomentar o acceso de mulleres e nenas á práctica do deporte e impulsar a igualdade neste ámbito e, entre os seus obxectivos específicos, introducir a perspectiva de xénero na planificación das actividades deportivas municipais a través de accións e ferramentas concretas, visibilizar as mulleres deportistas e fomentar o deporte como axente de igualdade e contra a violencia de xénero. O Plan estrutúrase en 25 liñas de traballo. A liña de traballo 13: deporte en igualdade, inclúe, entre outras, as seguintes medidas:

- Fomentar a participación das mulleres nas xuntas directivas dos clubs deportivos e nas entidades deportivas e promover unha presenza equilibrada de mulleres e homes nas porcentaxes de socias e socios.
- Apoiar e visibilizar as mulleres deportistas viguesas e promocionar os beneficios do deporte como ámbito para o empoderamento.
- Referenciar a cidade de Vigo como unha cidade que apoia o deporte feminino.



Venres, 22 de maio de 2026

Núm. 96

- Incluir imaxes igualitarias e contra a violencia de xénero nas campañas, lemas e imaxes dos eventos deportivos organizados polo Concello de Vigo.
- Sensibilizar en igualdade e na prevención da violencia de xénero a través da actividade física e deportiva, implicando a clubs, entidades e escolas deportivas da cidade.

### III

O Concello de Vigo quere promover o deporte feminino a través do apoio económico ás entidades deportivas da cidade que fomenten a participación e a promoción das nenas e das mulleres nas distintas modalidades deportivas. No ano 2017, o Concello de Vigo destinou 27.000 euros para esta finalidade e beneficiáronse un total de 56 entidades deportivas. Nos anos seguintes, este importe incrementouse a 45.000 euros e tamén aumentaron as entidades deportivas beneficiarias, así, no ano 2025, 83 entidades deportivas viguesas beneficiáronse destas subvencións.

No exercicio 2026, o Concello de Vigo destina un crédito máximo de 45.000 euros para estas subvencións, que se fará efectivo con cargo á aplicación orzamentaria 2311 4890000 Promoción da igualdade e do deporte feminino do orzamento vixente do Servizo de Igualdade.

O crédito previsto, a liña estratéxica, os obxectivos estratéxicos que se queren conseguir, o réxime de control e de seguimento e a modalidade de concesión destas axudas están previstos no Plan Estratéxico de Subvencións 2024-2026 do Concello de Vigo, aprobado pola Xunta de Goberno Local o 8 de marzo de 2024. Concretamente, estas subvencións están incluídas na liña estratéxica “4.8. Actividades de defensa da igualdade de xénero”, cuxos obxectivos, entre outros, son:

- Promover o acceso, a permanencia e a promoción das nenas e mulleres nas prácticas deportivas.
- Apoiar economicamente os clubs e as entidades deportivas da cidade que fomenten a participación e a promoción das nenas e mulleres nas competicións das distintas modalidades deportivas.
- Visibilizar e corrixir a segregación horizontal e vertical da participación das mulleres e nenas no deporte.
- Promover que se produza un aumento da repercusión nos medios sobre a participación das mulleres e nenas nas prácticas deportivas.

Estas subvencións contribúen ao logro destes obxectivos posto que fomentan o acceso, a permanencia e a promoción das mulleres e das nenas no deporte mediante o apoio económico ás entidades deportivas de Vigo que contén cun mínimo de 10 licenzas femininas ou 1 licenza feminina de deporte adaptado durante a tempada deportiva 2025/2026 ou do ano 2026 no caso das modalidades deportivas cuxa tempada se corresponda co ano natural.

A concesión destas subvencións efectuarase en réxime de concorrencia competitiva e segundo os principios de publicidade, libre concorrencia, obxectividade e transparencia.



Venres, 22 de maio de 2026

Núm. 96

As bases que seguen teñen por obxecto regular a concesión destas subvencións.

### BASES

#### PRIMEIRA.- OBXECTO DAS SUBVENCÍONS

Estas subvencións teñen por obxecto promover o deporte feminino a través do apoio económico ás entidades deportivas de Vigo que fomenten a participación e a promoción das nenas e das mulleres nas distintas modalidades deportivas (equipos e/ou individuais). Este apoio materializarase na contribución ao financiamento dos gastos ocasionados polo funcionamento destas entidades deportivas do municipio de Vigo durante a tempada deportiva 2025/2026 ou do ano 2026 no caso das modalidades deportivas cuxa tempada se corresponda co ano natural.

#### SEGUNDA.- GASTOS SUBVENCIONABLES

Serán gastos subvencionables os que de xeito indubidable correspondan ao funcionamento da entidade solicitante e sexan ocasionados pola actividade propia desta relacionada directamente coas licenzas femininas e os motivados pola participación ou organización das actividades deportivas dos equipos con licenzas femininas na tempada 2025/2026 ou do ano 2026 no caso das modalidades deportivas cuxa tempada se corresponda co ano natural.

A tempada 2025/2026 ou 2026 estará definida para cada modalidade deportiva en función dos datos certificados polas respectivas federacións.

Tendo en conta o establecido no parágrafo anterior, terán a consideración de gastos subvencionables os seguintes:

- Licenzas federativas femininas.
- Viaxes, aloxamentos e comidas das deportistas femininas ou dos equipos femininos (inclúese o persoal técnico e o persoal adestrador) nos desprazamentos necesarios para as actividades deportivas de competición e/ou clasificación. Para que estes gastos sexan subvencionables, a entidade deberá xustificar a necesidade de levar a cabo os desprazamentos para participar nas actividades deportivas de competición e/ou clasificación. Ademais, as facturas por gastos de comidas que se presenten para xustificar a subvención concedida deberán indicar o menú, o prezo por menú e o prezo total, estando excluídas, en todo caso, as bebidas alcohólicas de calquera tipo.
- Inscricións en competicións e probas das deportistas femininas ou dos equipos femininos.
- Arbitraxes das competicións e probas das deportistas femininas ou dos equipos femininos.
- Salarios do persoal técnico e do persoal adestrador das deportistas femininas ou dos equipos femininos.



Venres, 22 de maio de 2026

Núm. 96

- Equipamento das deportistas femininas sempre que este equipamento leve o logo do Concello de Vigo.
- Material deportivo necesario para o adestramento ou a competición das deportistas femininas ou dos equipos femininos.
- Alugueiro de instalacións deportivas para a actividade deportiva das deportistas femininas ou dos equipos femininos, gastos telefónicos, de internet e de mantemento das aplicacións web e/ou presenza dixital.

Os gastos polo uso das instalacións deportivas municipais do Concello de Vigo non se poderán imputar á subvención concedida polo Servizo de Igualdade cando eses gastos formen parte da conta xustificativa da subvención concedida polo Servizo de Deportes deste concello. O Servizo de Igualdade solicitará, nese caso, información ao Servizo de Deportes.

Quedan excluídos, en todo caso, como gastos subvencionables os seguintes: adquisición de bebidas alcohólicas de calquera tipo, espectáculos, adquisición de patrimonio e gastos de investimento.

A beneficiaria deberá solicitar tres ofertas cando se trate de gastos por subministros ou servizos que excedan de 15.000 euros, salvo que non exista mercado para as ditas contratacións.

En ningún caso se admitirán gastos cuxos prezos sexan superiores aos de mercado.

O órgano instrutor poderá solicitar ao Servizo de Deportes canta información e documentación teña ese Servizo sobre as entidades solicitantes, co obxecto de acadar un maior coñecemento e unha valoración máis axeitada das actividades das entidades presentadas a esta convocatoria.

### **TERCEIRA.- CRÉDITO ORZAMENTARIO**

O crédito orzamentario máximo destinado a estas subvencións é de 45.000 euros (corenta e cinco mil euros) que se farán efectivos con cargo á aplicación orzamentaria 2311 489000 Promoción da igualdade e do deporte feminino do orzamento vixente do Servizo de Igualdade.

### **CUARTA.- COMPATIBILIDADE DAS SUBVENCIONS**

Estas subvencións son compatibles con calquera outra subvención ou axuda para a mesma finalidade procedente de calquera outra administración ou de entes públicos ou privados, estatais, da Unión Europea ou de organismos internacionais.

A entidade beneficiaria deberá comunicarlle ao Concello de Vigo a obtención doutras subvencións, axudas, ingresos ou recursos que financien a actividade subvencionada. Esta comunicación deberá efectuarse no momento en que se coñeza e, en todo caso, con anterioridade á xustificación da aplicación dada aos fondos recibidos.

En ningún caso o importe total das subvencións e axudas percibidas de distintas entidades públicas e privadas poderá superar o custo da actividade subvencionada. Conforme o artigo 34 do Real decreto 887/2006, do 21 de xullo, polo que se aproba o Regulamento da Lei 38/2003,



Venres, 22 de maio de 2026

Núm. 96

do 17 de novembro, xeral de subvencións, cando se produza exceso das subvenciones percibidas de distintas entidades públicas respecto do custo da actividade, e as ditas subvencións foran compatibles entre si, a beneficiaria deberá reintegrar o exceso xunto cos xuros de demora. O reintegro do exceso farase a favor das entidades concedentes en proporción ás subvencións concedidas por cada unha delas. Porén, cando sexa a Administración a que advirta o exceso de financiamento, esixirá o reintegro polo importe total do exceso, hasta o límite da subvención outorgada por ela.

### QUINTA.- REQUISITOS DAS BENEFICIARIAS

1.- Poderán solicitar e obter estas axudas as entidades deportivas que reúnan os seguintes requisitos:

- a) Que teñan a súa sede social ou delegación no termo municipal de Vigo.
- b) Que teñan personalidade xurídica propia e carezan de ánimo de lucro.
- c) Que se atopen ao corrente no cumprimento das súas obrigas fiscais co Concello de Vigo e coa Facenda pública estatal e autonómica, e das súas obrigas coa Seguridade Social.
- d) Que cumpran os demais requisitos previstos no artigo 10 da Lei 9/2007, do 13 de xuño, de subvencións de Galicia, no artigo 13 da Lei 38/2003, do 17 de novembro, xeral de subvencións e no Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións.
- e) Que conten cun mínimo de 10 licenzas femininas na tempada 2025/2026 ou do ano 2026 no caso das modalidades deportivas cuxa tempada se corresponda co ano natural. Exceptuarase do mínimo de licenzas ás entidades que conten, ao menos, con 1 licenza feminina de deporte adaptado.
- f) Que presenten a solicitude e a documentación complementaria preceptiva indicada na base 11<sup>a</sup>.

2.- Quedan excluídas expresamente desta convocatoria:

- a) As solicitudes presentadas por federacións deportivas.
- b) As solicitudes presentadas por entidades pertencentes ou integradas en institucións oficiais.
- c) As solicitudes que se presenten fóra do prazo estipulado na convocatoria, calquera que sexa a causa da presentación extemporánea.

3.- As entidades solicitantes deberán acreditar que non están incursas nas prohibicións para obter a condición de beneficiaria sinaladas nos apartados 2 e 3 do artigo 10 da Lei 9/2007 de subvencións de Galicia mediante unha declaración responsable (artigo 10.7 da Lei 9/2007). Esta declaración está incluída no anexo IV que as entidades deberán presentar xunto coa súa solicitude.

4.- As solicitantes tamén deberán acreditar estar ao corrente no cumprimento das súas obrigas tributarias e coa Seguridade Social conforme establece o artigo 22 do Real decreto 887/2006,



Venres, 22 de maio de 2026

Núm. 96

do 21 de xullo, polo que se aproba o Regulamento da Lei 38/2003, do 17 de novembro, xeral de subvencións. Dado que a contía máxima da subvención que se lle pode conceder a cada beneficiaria é de 1.500 euros, esta acreditación farase por medio dunha declaración responsable (artigo 24.4 do Real decreto 887/2006). Esta declaración está incluída no anexo IV que as entidades deberán presentar xunto coa súa solicitude.

5.- Igualmente, as entidades solicitantes deberán atoparse ao corrente das súas obrigas co Concello de Vigo. Coa presentación da súa solicitude, a entidade autoriza ao órgano instrutor para pedir de oficio os datos e a documentación acreditativos de tal extremo aos departamentos municipais responsables.

## SEXTA.- OBRIGAS DAS BENEFICIARIAS

Serán obrigas das beneficiarias das subvencións, sen prexuízo doutras establecidas nestas bases, as que seguen:

1.- Realizar a actividade deportiva subvencionada consonte co proxecto presentado e deixar constancia do financiamento municipal coa inclusión do logotipo do Concello de Vigo.

As entidades beneficiarias deben dar a axeitada publicidade do carácter público do financiamento da actividade subvencionada (artigo 15.3 da Lei 9/2007, do 13 de xuño, de subvencións de Galicia). Tanto nos actos públicos como en todo o material de difusión que se elabore, incluídas as notas de prensa e os formatos específicos para as redes sociais, as beneficiarias deben facer mención expresa da colaboración do Concello de Vigo, coa inclusión, nun lugar destacado dos diferentes soportes, do logotipo do Concello de Vigo. Se no financiamento interveñen outras entidades, a prelación en orde e tamaños será proporcional á contía da axuda achegada por cada unha delas.

2.- Responder da veracidade dos datos da solicitude e da documentación presentada, baixo a persoal responsabilidade da/s persoa/s que as subscriba/n.

3.- Utilizar unha linguaxe e unha imaxe non sexista en todo o soporte material e audiovisual que se empregue para a organización, difusión e execución das súas actividades.

4.- Someterse ás actuacións de comprobación, seguimento, control financeiro e inspección que o Concello de Vigo considere necesarias, ás previstas na lexislación do Tribunal de Contas e do Consello de Contas e ás doutros órganos da Administración estatal ou da Unión Europea, aos que se lles facilitará a información que requiran para estes efectos, todo isto de conformidade co disposto na Lei 9/2007, de subvencións de Galicia e demais normativa regulamentaria de desenvolvemento. En particular, deberán prestar a colaboración requirida polas entidades encargadas polo Concello de Vigo de elaborar auditorías e informes, atendendo aos seus requirimentos e achegando a documentación complementaria solicitada. As beneficiarias deberán dispoñer dun control dos ingresos e dos gastos que imputen á actividade subvencionada e deberán conservar os documentos xustificativos da aplicación dos fondos recibidos, incluídos os documentos electrónicos, en canto poidan ser obxecto das actuacións de comprobación e control.



Venres, 22 de maio de 2026

Núm. 96

5.- Responder legalmente da falta de veracidade dos datos expostos e do incumprimento destas bases.

6.- Asumir as responsabilidades que poidan derivarse da realización das actividades subvencionadas.

7.- Dispor das autorizacións necesarias para o desenvolvemento das súas actividades, así como cumprir os requisitos e as demais condicións que a lexislación vixente estableza.

8.- Aboar as taxas, os impostos, os permisos, os seguros e todos os demais gastos derivados da realización das actividades subvencionadas.

9.- Facilitar a información necesaria relativa ao desenvolvemento da actividade subvencionada que permita cumprir os requisitos de información de realización e de resultados previstos nestas bases. As entidades beneficiarias deberán realizar as actuacións precisas para recoller a información necesaria sobre as mulleres e nenas deportistas participantes en cada acción e os resultados obtidos, que deberán incluír na memoria final que acheguen para xustificar a subvención concedida.

10.- Comunicarlle ao Concello a obtención doutras subvencións, ingresos, axudas ou recursos para a mesma finalidade, procedentes de calquera administración pública ou entidade pública ou privada, así como calquera outra modificación das circunstancias que foron tidas en conta para a concesión da subvención e dos compromisos e obrigas asumidos polas beneficiarias. Esta comunicación deberase efectuar no momento en que se coñeza e, en todo caso, con anterioridade á xustificación da aplicación dada aos fondos percibidos.

11.- Cumprir a normativa de protección de datos persoais, en particular, o Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais (Regulamento xeral de protección de datos) e a Lei orgánica 3/2018, do 5 de decembro, de protección de datos persoais e garantía dos dereitos dixitais.

As entidades beneficiarias serán responsables de informar de maneira fidedigna ás destinatarias finais do tratamento que levarán a cabo sobre os seus datos, conforme o especificado no artigo 13 do Regulamento xeral de protección de datos, para o que solicitarán o seu consentimento explícito. Así mesmo, as entidades beneficiarias serán responsables de custodiar a documentación que acredite o cumprimento destas obrigas.

12.- As demais obrigas establecidas no artigo 11 da Lei 9/2007, do 13 de xuño, de subvencións de Galicia, no artigo 14 da Lei 38/2003, do 17 de novembro, xeral de subvencións e no Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións.



Venres, 22 de maio de 2026

Núm. 96

**SÉTIMA.- CRITERIOS DE VALORACIÓN**

A Comisión de Avaliación avaliará as solicitudes que reúnan os requisitos esixidos segundo os seguintes criterios e baremos de puntuación sobre un máximo de 26 puntos:

1.- Número de licenzas femininas na tempada deportiva 2025-2026 ou do ano 2026 no caso das modalidades deportivas cuxa tempada se corresponda co ano natural. Ata un máximo de 16 puntos no caso das modalidades deportivas do apartado 1.1 e de 8 puntos no caso das modalidades deportivas do apartado 1.2:

1.1 Puntuación segundo o número de licenzas femininas (excepto: actividades subacuáticas, golf, hípica, judo, karate, montañismo, pádel, surf, taekwondo e tenis):

- a) Con menos de 35 licenzas femininas: 4 puntos
- b) Con 35 licenzas femininas e menos de 60: 6 puntos
- c) Con 60 licenzas femininas e menos de 85: 8 puntos
- d) Con 85 licenzas femininas e menos de 110: 10 puntos
- e) Con 110 licenzas femininas e menos de 135: 12 puntos
- f) Con 135 licenzas femininas e menos de 150: 14 puntos
- g) Con 150 licenzas ou máis: 16 puntos

1.2 Puntuación segundo o número de licenzas femininas para actividades subacuáticas, golf, hípica, judo, karate, montañismo, pádel, surf, taekwondo e tenis:

- a) Con menos de 70 licenzas femininas: 2 puntos
- b) Con 70 licenzas femininas e menos de 120: 3 puntos
- c) Con 120 licenzas femininas e menos de 170: 4 puntos
- d) Con 170 licenzas femininas e menos de 220: 5 puntos
- e) Con 220 licenzas femininas e menos de 270: 6 puntos
- f) Con 270 licenzas femininas e menos de 320: 7 puntos
- g) Con 320 licenzas ou máis: 8 puntos

Cando unha mesma entidade presente licenzas femininas correspondentes a varias modalidades deportivas, sexan do mesmo ou de distintos apartados (1.1 e 1.2), calcularase a puntuación que corresponda a cada modalidade e logo sumarase para acadar a puntuación total do apartado 1, co límite máximo de 16 puntos.

2.- Porcentaxe das licenzas femininas con respecto ao total das licenzas da entidade na modalidade deportiva na tempada 2025/2026 ou do ano 2026 no caso das modalidades deportivas cuxa tempada se corresponda co ano natural. Ata un máximo de 5 puntos no caso das modalidades deportivas do apartado 2.1 e de 3 puntos no caso das modalidades deportivas do apartado 2.2:

2.1 Puntuación segundo a porcentaxe de licenzas femininas (excepto: actividades subacuáticas, golf, hípica, judo, karate, montañismo, pádel, surf, taekwondo e tenis):



Venres, 22 de maio de 2026

Núm. 96

- a) Ata o 20% de licenzas femininas: 1 punto
- b) Máis do 20% de licenzas femininas ata o 40%: 2 puntos
- c) Máis do 40% de licenzas femininas ata o 60%: 3 puntos
- d) Máis do 60% de licenzas femininas ata o 80%: 4 puntos
- e) Máis do 80% de licenzas femininas: 5 puntos

2.2 Puntuación segundo a porcentaxe de licenzas femininas para actividades subacuáticas, golf, hípica, judo, karate, montañismo, pádel surf, taekwondo e tenis:

- a) Ata o 20% de licenzas femininas: 1 punto
- b) Máis do 20% de licenzas femininas ata o 40%: 1,5 puntos
- c) Máis do 40% de licenzas femininas ata o 60%: 2 puntos
- d) Máis do 60% de licenzas femininas ata o 80%: 2,5 puntos
- e) Máis do 80% de licenzas femininas: 3 puntos

Cando unha mesma entidade presente licenzas correspondentes a varias modalidades deportivas, sexan do mesmo ou de distintos apartados (2.1 e 2.2), calcularase a porcentaxe de licenzas femininas de cada modalidade deportiva con respecto ao número total de licenzas da entidade nas modalidades deportivas para as que solicita a subvención. Calcularase a puntuación para cada modalidade deportiva e despois sumarase para acadar a puntuación total do apartado 2, co límite máximo de 5 puntos.

A documentación que se terá en conta para facer o reconto de licenzas, así como para clasificar as modalidades deportivas, será o anexo II cuberto e asinado pola federación correspondente.

Para estes efectos, o certificado da federación indicará todas as licenzas da entidade na súa modalidade deportiva, incluíndo todas as categorías e todos os equipos, sexan femininos, masculinos ou mixtos.

3.- Porcentaxe de mulleres que integran a actual xunta directiva da entidade. Ata un máximo de 5 puntos:

- a) Se ningunha muller forma parte da actual xunta directiva da entidade: 0 puntos
- b) Menos do 20% de mulleres: 1 punto
- c) Do 20% de mulleres ata menos do 40%: 2 puntos
- d) Do 40% de mulleres ata menos do 60%: 3 puntos
- e) Do 60% de mulleres ata menos do 80%: 4 puntos
- f) Do 80% de mulleres en diante: 5 puntos

#### OITAVA.- CONTÍA INDIVIDUALIZADA DAS SUBVENCIÓNS

A contía da axuda concedida a cada beneficiaria determinarase en función do crédito orzamentario (45.000 euros), do importe que solicite e da puntuación derivada da aplicación dos criterios de valoración definidos nestas bases.



Venres, 22 de maio de 2026

Núm. 96

O crédito orzamentario dividirase entre a suma dos puntos acadados pola totalidade das solicitudes admitidas, obtendo desta forma o valor unitario do punto. A subvención para cada entidade calcularase multiplicando o valor unitario do punto polos puntos que obteña.

A contía mínima da subvención que cada entidade pode solicitar e obter é de 200 euros. Non terán dereito á subvención as entidades que, pola súa puntuación, non acaden unha axuda igual ou superior a 200 euros.

A contía máxima da subvención que cada beneficiaria pode solicitar e obter é de 1.500 euros.

Ningunha entidade poderá obter unha axuda superior á solicitada. Se, pola súa puntuación, lle correspondese unha axuda superior, reducirase a contía da axuda concedida ao importe que solicitou.

Se tras a repartición do crédito orzamentario entre as entidades beneficiarias, quedase crédito sobrance, este distribuirase entre as entidades que non acadaran o importe que solicitaron de forma proporcional a súa puntuación, tendo en conta o límite da contía solicitada pola entidade.

A subvención concedida, en ningún caso, poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

## **NOVENA.- PROCEDIMIENTO PARA A CONCESIÓN DAS SUBVENCIÓNS**

O procedemento para a concesión destas subvencións é o de concorrencia competitiva que se iniciará de oficio tras a aprobación destas bases reguladoras e da convocatoria pola Xunta de Goberno Local.

## **DÉCIMA.- PRAZO DE PRESENTACIÓN DAS SOLICITUDES**

O prazo de presentación de solicitudes é de 10 días hábiles, que se contarán, nos termos do art. 30.3 da Lei 39/2015, do 1 de outubro do procedemento administrativo común das administracións públicas, dende o día seguinte ao da publicación do extracto da convocatoria no Boletín Oficial da provincia de Pontevedra, que será comunicado desde a Base de Datos Nacional de Subvencións (BDNS), que opera como Sistema Nacional de Publicidade de Subvencións e Axudas Públicas, sen prexuízo da súa inserción na web do Concello de Vigo.

## **DÉCIMO PRIMEIRA.- FORMA E LUGAR DE PRESENTACIÓN DAS SOLICITUDES. DOCUMENTACIÓN COMPLEMENTARIA**

Cada entidade deportiva poderá presentar unha única solicitude, que deberá estar asinada electronicamente pola presidencia da entidade e reunir os requisitos esixidos nestas bases.

As entidades interesadas empregarán o formulario normalizado (anexo I) dispoñible na sede electrónica do Concello de Vigo (<https://sede.vigo.org>) para a presentación das súas solicitudes.



Venres, 22 de maio de 2026

Núm. 96

As solicitudes presentaranse obrigatoriamente por medios electrónicos en cumprimento da obriga imposta polo artigo 14.2.a) da Lei 39/2015, do 1 de outubro, do procedemento administrativo común das administracións públicas (LPAC), a través do Rexistro xeral do Concello de Vigo, ao que se accede pola sede electrónica, utilizando calquera dos medios de identificación e firma admitidos, que se poden consultar no enlace <https://sede.vigo.org>.

De conformidade co artigo 68.4 da LPAC, se algunha das entidades interesadas presenta a súa solicitude de forma presencial, requiriráselle para que a emende a través da súa presentación electrónica. Para estes efectos considerárase como data de presentación da solicitude aquela en que fose realizada a emenda.

Todas as solicitudes, incluíndo as emendas telemáticas contempladas no parágrafo anterior, deben presentarse dentro do prazo de presentación de solicitudes. A Comisión de Avaliación non valorará as solicitudes que sexan presentadas con carácter extemporáneo e propondrá a súa denegación ao órgano competente.

As entidades solicitantes responsabilizaranse da veracidade dos datos contidos nas súas solicitudes.

A solicitude estará asinada electronicamente pola presidencia da entidade e súa presentación suporá que as entidades solicitantes coñecen e aceptan as presentes bases reguladoras.

A entidade indicará na súa solicitude (anexo I) a modalidade deportiva para a que solicita a subvención. Se solicita a axuda para varias modalidades deportivas, indicará cada unha delas.

Non se considerarán como modalidade deportiva as especialidades deportivas que estean vinculadas ou organizadas dentro da mesma modalidade deportiva. Para estes efectos, teranse en conta os apartados 2 e 3 do artigo 17 da Lei 3/2012, do 2 de abril, do deporte de Galicia que establecen, respectivamente, que se entende por “modalidade deportiva o conxunto de prácticas e regras que conforman unha forma peculiar de práctica deportiva con carácter autónomo e diferenciado de calquera outra”, e “por especialidade deportiva aquela práctica deportiva que, pese a non reunir os requisitos para ser considerada modalidade deportiva, ten singularidade na súa práctica, aínda que vinculada ou organizada dentro dunha modalidade deportiva tanto por razóns históricas da súa práctica como pola existencia dun elemento de práctica común a todas elas”.

Excepto no ámbito dos deportes autóctonos da Comunidade autónoma, no que se poderán agrupar diferentes modalidades deportivas nunha única federación, só se poderá recoñecer unha federación deportiva por cada modalidade deportiva (art. 51.5º Lei 3/2012, do 2 de abril, do deporte de Galicia).

A entidade que solicite a subvención para varias modalidades deportivas deberá achegar os certificados (anexo II) das distintas federacións deportivas. Con carácter excepcional, a Federación Galega de Deporte Autóctono e a Federación Galega de Deporte Adaptado poderán certificar varias modalidades deportivas. Nestes casos, a entidade deberá achegar un anexo II, cuberto e asinado pola Federación Galega de Deporte Autóctono ou pola Federación Galega de



Venres, 22 de maio de 2026

Núm. 96

Deporte Adaptado segundo corresponda, por cada unha das modalidades deportivas incluídas na súa solicitude de subvención.

A documentación complementaria presentárase exclusivamente por medios electrónicos en cumprimento da obriga imposta polo artigo 14.2.a) da Lei 39/2015, do 1 de outubro, do procedemento administrativo común das administracións públicas (LPAC), a través do Rexistro xeral do Concello de Vigo, ao que se accede pola sede electrónica, utilizando calquera dos medios de identificación e firma admitidos, que se poden consultar no enlace <https://sede.vigo.org>.

Se a documentación complementaria se achegase de forma presencial, a entidade será requirida para emendala a través da súa presentación electrónica. Para estes efectos, considerarase como data de presentación aquela na que fose realizada a emenda.

Excepcionalmente, cando a relevancia do documento no procedemento o esixa ou existan dúbidas derivadas da calidade da copia electrónica, a Administración poderá requirir a exhibición do documento orixinal para o cotexo da copia electrónica presentada.

As entidades solicitantes responsabilizaranse da veracidade dos documentos que presenten e dos datos contidos neles.

Xunto coa súa solicitude, as entidades interesadas presentarán a seguinte documentación complementaria:

#### 1.- Anexo II. Certificado da federación

A entidade solicitante debe achegar o anexo II cuberto pola federación da modalidade deportiva para a que solicite a subvención e asinado pola secretaría e pola presidencia da federación. A entidade que solicite a axuda para varias modalidades deportivas deberá achegar os certificados (anexo II) das distintas federacións deportivas.

Con carácter excepcional, a Federación Galega de Deporte Autóctono e a Federación Galega de Deporte Adaptado poderán certificar varias modalidades deportivas. Nestes casos, a entidade deberá achegar un anexo II, cuberto e asinado pola Federación Galega de Deporte Autóctono ou pola Federación Galega de Deporte Adaptado segundo corresponda, por cada unha das modalidades deportivas incluídas na súa solicitude de subvención.

A federación correspondente indicará neste anexo todas as licenzas que a entidade deportiva ten na súa modalidade deportiva, incluíndo todas as categorías e todos os equipos, sexan femininos, masculinos ou mixtos.

#### 2.- Anexo III. Orzamento equilibrado de ingresos e gastos

Neste anexo, que debe estar asinado pola secretaría e pola presidencia (electronicamente), a entidade solicitante indicará o orzamento previsto para a tempada 2025/2026 ou do ano 2026 no caso das modalidades deportivas cuxa tempada se corresponda co ano natural.



Venres, 22 de maio de 2026

Núm. 96

Este orzamento terase en conta na fase de xustificación da subvención concedida: se a entidade beneficiaria declara un gasto total final na tempada inferior ao 100% do orzamento que indicou no anexo III, a axuda concedida será minorada proporcionalmente.

### 3.- Anexo IV. Declaración responsable

Neste anexo, a secretaría da entidade, co visto e praxe da presidencia declara, entre ou-tros, os seguintes puntos:

- Quen ten a condición de representante legal da entidade
- Outras axudas solicitadas ou concedidas na tempada de referencia
- Que a entidade está ao corrente no cumprimento das súas obrigas tributarias coa Axencia Tributaria, a Consellería de Facenda da Xunta de Galicia e o Concello de Vigo, e das súas obrigas coa Seguridade Social.
- Que a entidade non está incurso nas prohibicións para obter a condición de beneficiaria que recollen os apartados 2 e 3 do artigo 10 da Lei 9/2007, do 13 de xuño, de subvencións de Galicia.

### 4.- Anexo V. Certificado da composición da actual xunta directiva

A secretaría da entidade, co visto e praxe da presidencia, emitirá este certificado onde constará a composición da actual xunta directiva desagregada por sexo.

### 5.- CIF da entidade solicitante.

### 6.- Certificado da titularidade da conta bancaria da entidade solicitante expedido no ano 2026.

7.- Memoria das actividades que desenvolva a entidade na tempada de referencia, facendo especial fincapé nos aspectos cuantitativos e cualitativos da promoción do deporte feminino.

Esta memoria deberá incluír: descrición xeral da entidade, número de equipos por categoría e sexo, relación das competicións nas que participa cada un dos equipos con licenzas femininas ou, de ser o caso, as deportistas individuais e logros acadados, actuacións que a entidade leva a cabo orientadas á igualdade e valoración sobre o impacto de xénero na súa modalidade deportiva.

Segundo o establecido no art. 28.2 da LPAC, as persoas interesadas teñen dereito a non achegar os documentos que xa se atopen en poder da administración actuante ou fosen elaborados por calquera outra administración. A Administración municipal, salvo oposición expresa da entidade interesada, consultará e obterá electronicamente, a través das súas redes corporativas ou mediante consulta ás plataformas de intermediación de datos u outros sistemas electrónicos habilitados para o efecto, os documentos que deban integrar o procedemento e que xa se atopen no seu poder ou que foran elaborados por calquera outra administración.

En relación co dereito a non presentar documentos que obren en poder da administración convocante, a entidade deberá indicar a data e o órgano ou a dependencia na que foron presentados ou, no seu caso, o número de expediente ou procedemento no que se fixeron valer.



Venres, 22 de maio de 2026

Núm. 96

O Servizo de Igualdade pode requirir ás entidades solicitantes que acheguen a información e a documentación complementaria que considere necesarias para comprobar que reúnen os requisitos esixidos para participar nesta convocatoria ou para a correcta avaliación das súas solicitudes.

#### **DÉCIMO SEGUNDA.- EMENDA DA SOLICITUDE**

Se a solicitude non está debidamente cumprimentada ou non se presenta a documentación esixida, requiriráselle á entidade solicitante que, no prazo máximo de 10 días hábiles, contados desde o día seguinte a aquel en que teña lugar a notificación do requirimento, emende a falta ou achegue os documentos preceptivos, coa advertencia de que, de non facelo, considerarase que desistiu da súa solicitude, de acordo co previsto no artigo 20.5 da Lei 9/2007, do 13 de xuño, de subvencións de Galicia, logo de que se dite a oportuna resolución ao abeiro do artigo 21 da Lei 39/2015, do 1 de outubro, do procedemento administrativo común das administracións públicas.

As notificacións realizaranse por medios electrónicos, nos termos previstos na normativa reguladora do procedemento administrativo común, e entenderanse practicadas no momento no que se produza o acceso ao seu contido. A notificación entenderase rexeitada cando transcorresen 10 días naturais desde a posta á disposición da notificación sen que se acceda ao seu contido.

Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

Reemitiráselles ás interesadas os avisos da posta á disposición das notificacións ao enderezo de correo electrónico e/ou teléfono móbil que consten nas súas solicitudes. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

#### **DÉCIMO TERCEIRA.- PUBLICIDADE**

##### 1.- Publicidade das bases reguladoras e da convocatoria

As presentes bases reguladoras e a convocatoria, conforme establece o artigo 20.8 apartados a) e b) da Lei 38/2003, do 17 de novembro, xeral de subvencións, en aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, publicaranse en:

- a) As bases reguladoras: no Boletín Oficial da provincia de Pontevedra (BOPPO), no portal de transparencia e na páxina web do Concello de Vigo ([www.vigo.org](http://www.vigo.org))
- b) A convocatoria: na Base de Datos Nacional de Subvencións (BDNS), no portal de transparencia e na páxina web do Concello de Vigo ([www.vigo.org](http://www.vigo.org))
- c) O extracto da convocatoria: a BDNS dará traslado ao BOPPO do extracto da convocatoria para a súa publicación, publicación que determinará o inicio do prazo de 10 días hábiles para a presentación das solicitudes.



Venres, 22 de maio de 2026

Núm. 96

As bases reguladoras e a convocatoria, así como o modelo de solicitude e demais modelos normalizados que constitúen os seus anexos, publicaranse na páxina web do Concello de Vigo ([www.vigo.org](http://www.vigo.org)) e na da Concellería de Igualdade ([www.igualdadevigo.org](http://www.igualdadevigo.org)).

## 2.- Publicidade das subvencións concedidas

As subvencións concedidas remitiranse ao portal de transparencia do Concello e á BDNS para a súa publicación con indicación da convocatoria, programa e crédito orzamentario ao que se imputan, entidades beneficiarias, cantidades concedidas e finalidade das subvencións.

## 3.- Publicidade do financiamento público

As entidades beneficiarias deben dar a axeitada publicidade do carácter público do financiamento nas comunicacións e no desenvolvemento das actividades subvencionadas, facendo constar, nun lugar destacado dos diferentes soportes (equipamento, web, redes sociais, carteis publicitarios, etc.), o logotipo do Concello de Vigo, que se pode descargar da páxina web da Concellería de Igualdade ([www.igualdadevigo.org](http://www.igualdadevigo.org)). Se no financiamento interveñen outras entidades, a prelación en orde e tamaños será proporcional á contía achegada por cada unha delas.

## **DÉCIMO CUARTA.- ÓRGANOS COMPETENTES PARA A INSTRUCCIÓN E A RESOLUCIÓN DO PROCEDIMENTO. PRAZO E MEDIOS PARA A NOTIFICACIÓN DA RESOLUCIÓN**

O Servizo de Igualdade encargárase da instrución do procedemento de concesión das subvencións e realizará de oficio cantas actuacións estime necesarias para a determinación, o coñecemento e a comprobación dos datos en virtude dos cales debe formularse a proposta de resolución, de conformidade co previsto no art. 24 da Lei 38/2003, do 17 de novembro, xeral de subvencións.

O órgano instrutor poderá solicitar ao Servizo de Deportes canta información e documentación teña ese Servizo sobre as entidades solicitantes, co obxecto de acadar un maior coñecemento das solicitudes presentadas a esta convocatoria.

Todos os trámites administrativos que se deban realizar durante a tramitación deste procedemento deberán ser realizados a través da sede electrónica do Concello de Vigo.

Para a valoración das solicitudes presentadas, constituirase unha Comisión de Avaliación. Esta comisión é o órgano colexiado composto pola concelleira delegada de Igualdade e Comercio, que actuará como presidenta, e por dúas técnicas adscritas ao Servizo de Igualdade, unha delas será, ademais, a secretaria.

Logo de excluír as solicitudes recibidas que non reúnan os requisitos que se indican na base 5ª, a Comisión de Avaliación avaliará as demais solicitudes segundo os criterios e os baremos indicados na base 7ª.



Venres, 22 de maio de 2026

Núm. 96

Unha vez avaliadas as solicitudes, a Comisión emitirá un informe motivado no que relacionará as entidades beneficiarias e a puntuación asignada a cada unha delas. A secretaria levantará unha acta que reflita as deliberacións e acordos da Comisión.

O Servizo de Igualdade, en base ao informe da Comisión, formulará a proposta de resolución de concesión e denegación das subvencións solicitadas, que elevará á Xunta de Goberno Local.

O expediente de concesión das subvencións conterá o informe do órgano instrutor no que conste que, da información que ten no seu poder, se desprende que as beneficiarias cumpren todos os requisitos necesarios para acceder a estas axudas (artigo 21.4 parágrafo 6 da Lei 9/2007, do 13 de xuño, de subvencións de Galicia).

A Xunta de Goberno Local é o órgano competente para a resolución do procedemento de concesión e denegación destas subvencións. O prazo máximo para a instrución e a notificación da resolución expresa deste procedemento será de tres meses, que se contarán desde o último día do prazo de presentación de solicitudes. A resolución notificaráselles ás solicitantes no prazo de 10 días a partir da súa data, de acordo co previsto no artigo 40 da LPAC. Por tratarse dun acto integrante dun procedemento de concorrencia competitiva, a notificación poderá substituírse pola publicación da resolución na páxina web do Concello de Vigo ([www.vigo.org](http://www.vigo.org)). En todo caso, a resolución será obxecto de publicación na páxina web do Concello ([www.vigo.org](http://www.vigo.org)), de acordo co establecido no art. 45.1.b) da LPAC.

O vencemento do prazo máximo sen terse ditada e notificada a resolución, lexitima ás interesadas para entender desestimadas por silencio administrativo as súas solicitudes de subvención, sen prexuízo do disposto no artigo 25.1 da LPAC.

As notificacións efectuaranse só por medios electrónicos, nos termos previstos na normativa reguladora do procedemento administrativo común. As notificacións entenderanse efectuadas no momento en que se produza o acceso ao seu contido, e rexeitadas cando transcorresen 10 días naturais desde a posta á disposición da notificación sen que se acceda ao seu contido. Se o envío da notificación electrónica non é posible por problemas técnicos practicarase a notificación polos medios previstos na normativa reguladora do procedemento administrativo común.

Remitiráselles ás interesadas os avisos da posta á disposición das notificacións ao correo electrónico e/ou teléfono móbil que consten nas súas solicitudes. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

O acordo da Xunta de Goberno Local de concesión e denegación das axudas esgota a vía administrativa e contra el cabe interpoñer recurso potestativo de reposición ante a Xunta de Goberno Local no prazo dun (1) mes de acordo cos artigos 123 e 124 da LPAC ou, directamente, recurso contencioso-administrativo ante os xulgados do contencioso-administrativo de Vigo, no prazo de dous (2) meses. Non se poderá interpoñer recurso contencioso-administrativo ata que se resolva expresamente ou se produza a desestimación por silencio administrativo do recurso de reposición interposto. Os prazos contaranse a partir do día seguinte ao da notificación



Venres, 22 de maio de 2026

Núm. 96

ou publicación ou desde o seguinte a aquel no que se produza a desestimación por silencio administrativo (artigo 30.4 LPAC).

As entidades beneficiarias deben comunicarlle ao Servizo de Igualdade a aceptación da subvención no prazo máximo de 10 días, que se contarán desde o día seguinte ao da notificación da concesión. A falta de manifestación expresa, entenderase tacitamente aceptada.

A beneficiaria poderá renunciar á subvención concedida por calquera medio que permita a súa constancia. A renuncia será aceptada de plano pola administración concedente declarando concluso o procedemento correspondente (artigo 94 da LPAC).

## DÉCIMO QUINTA.- XUSTIFICACIÓN DAS SUBVENCIONS

A xustificación do cumprimento das condicións impostas e da consecución dos obxectivos previstos no acto da concesión da subvención deberá documentarse na conta xustificativa do gasto realizado.

A presentación da conta xustificativa constitúe un acto obrigatorio da beneficiaria na que se debe incluír, baixo a responsabilidade da declarante, os xustificantes de gasto ou calquera outro documento con validez xurídica que permitan acreditar o cumprimento do obxecto da subvención.

### 1.- Prazo de xustificación

As beneficiarias deberán presentar a conta xustificativa con data límite o 16 de outubro de 2026 (incluído).

Transcorrida a data límite (16/10/2026, incluído) sen que a entidade beneficiaria presentase a conta xustificativa, requiriráselle para que a presente no prazo improrrogable de quince días (artigo 70.3 do Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións).

No caso de que xustificación presentada fora defectuosa e/ou incompleta, concederáse á entidade beneficiaria un prazo improrrogable de 10 días hábiles para a súa emenda. Se a entidade non atende o requirimento no prazo indicado, procederáse á revogación da subvención concedida e, de ser o caso, á esixencia de reintegro da contía percibida e dos xuros de demora previa a resolución ditada nos termos previstos no artigo 21 da LPAC.

### 2.- Cantidade a xustificar

A entidade beneficiaria deberá presentar xustificantes de gasto por un importe total que non poderá ser inferior á contía da subvención concedida.

Ademais, a entidade deberá xustificar o gasto total final na tempada de referencia mediante unha das seguintes opcións:

- a) Certificación que acredite que o gasto total final da entidade na tempada de referencia é de ..... € (punto 3 do anexo VI), ou



Venres, 22 de maio de 2026

Núm. 96

- b) Presentación dun balance que abarque a totalidade do gasto, ou
- c) Presentación de copias de facturas polo gasto non subvencionado.

Cando a beneficiaria xustifique un gasto total final na tempada de referencia inferior ao orzamento que indicou no anexo III, procederase a minorar proporcionalmente a axuda concedida.

O importe que se terá en conta para xustificar a subvención é a base impoñible das facturas e demais documentos de valor probatorio equivalente que se presenten, excepto que a entidade acredite que está exenta de presentar a declaración do IVE. Para os efectos desta acreditación, a entidade pode cubrir o punto 8 do anexo VI ou presentar o certificado da Axencia Tributaria.

### 3.- Sistema de xustificación

A conta xustificativa presentarase obrigatoriamente por medios electrónicos en cumprimento da obriga imposta polo artigo 14.2.a) da Lei 39/2015, do 1 de outubro, do procedemento administrativo común das administracións públicas (LPAC), a través do Rexistro xeral do Concello de Vigo, ao que se accede pola sede electrónica, utilizando calquera dos medios de identificación e firma admitidos, que se poden consultar no enlace <https://sede.vigo.org>.

De conformidade co artigo 68.4 da LPAC, se algunha das beneficiarias presenta a conta xustificativa de forma presencial, requiriráselle para que a emende a través da súa presentación electrónica. Para estes efectos considerárase como data de presentación da xustificación aquela en que fose realizada a emenda.

A conta xustificativa conterá a seguinte documentación:

#### a) Anexo VI. Solicitud de pagamento

Neste anexo, que estará asinado pola secretaría e pola presidencia (electronicamente), a entidade certifica que a actividade deportiva que foi obxecto da subvención foi executada na súa totalidade, e declara:

- O gasto total final da entidade na tempada de referencia. Cando este gasto total final sexa inferior ao 100% do orzamento que a entidade indicou no anexo III, procederase a minorar proporcionalmente a axuda concedida.
- A obtención doutras axudas ou subvencións para a actividade subvencionada, con indicación do seu importe e da súa procedencia, de ser o caso.
- Que os gastos que se imputan á subvención aplicáronse á actividade subvencionada co obxecto de promover o deporte feminino.
- Cando se xustifiquen gastos que constitúan rendementos incluídos no ámbito de aplicación do Imposto sobre a renda das persoas físicas suxeitos a retención, que foi practicada a pertinente retención, así como que esta foi ou será declarada, liquidada e ingresada na Axencia Estatal da Administración Tributaria.
- Estar ao corrente no cumprimento das súas obrigas tributarias coa Axencia Tributaria, a Consellería de Facenda da Xunta de Galicia e o Concello de Vigo, e das súas obrigas coa



Venres, 22 de maio de 2026

Núm. 96

Seguridade Social, e non ser debedora por resolución de procedencia de reintegro (art. 31.7.e) da Lei 9/2007, de subvencións de Galicia).

- Se está exenta ou non está exenta da obriga de presentar a declaración do IVE e, de ser o caso, que o importe do IVE das facturas que se presentan para xustificar a subvención concedida é asumido pola entidade beneficiaria ao non poder deducilo.

b) Anexo VII. Relación de facturas e xustificantes que se imputan á axuda concedida

Neste anexo, asinado pola tesourería e pola presidencia (electronicamente), a entidade relacionará e identificará cada unha das facturas e dos xustificantes que achega para xustificar a subvención concedida, cuxo importe total non poderá ser inferior á contía da axuda.

c) Facturas e xustificantes de gasto relacionados no anexo VII, que deben achegarse asinados (electronicamente) pola presidencia da entidade.

As ditas facturas e xustificantes corresponderán a gastos que deben estar vinculados directamente coas actividades deportivas dos equipos con licenzas femininas ou das deportistas femininas individuais na tempada de referencia.

Se a tempada da súa modalidade deportiva se corresponde co ano natural e o seu calendario de competicións finaliza en novembro ou en decembro de 2026, segundo conste no certificado da federación (anexo II), a beneficiaria poderá achegar xustificantes de gastos dos meses de novembro e decembro de 2025, segundo corresponda.

Non terá que constar de forma expresa que os gastos imputados á subvención foron pagados con anterioridade á finalización do período de xustificación establecido nestas bases en atención á escasa contía das axudas que se conceden e á insuficiente capacidade económica da maior parte das entidades que concorren. Os artigos 31.2 da Lei 38/2003, do 17 de novembro, xeral de subvencións e 29.2 da Lei 9/2007, do 13 de xuño, de subvencións de Galicia permiten a excepción á regra xeral de considerar gasto realizado o que ten sido efectivamente pagado con anterioridade á finalización do período de xustificación determinado pola normativa reguladora da subvención, sempre que se dispoña de forma expresa nas bases reguladoras das subvencións.

As facturas deberán conter os seguintes requisitos esixidos legalmente:

- Número e, no seu caso, serie.
- Nome e apelidos ou razón social, e número de identificación fiscal (NIF ou CIF) da persoa física ou xurídica que emite a factura
- Descrición detallada cos prezos unitarios, se é o caso, da operación, adquisición ou contraprestación.
- Lugar e data de emisión.
- Razón social, CIF e enderezo da clienta que, en todo caso, será a entidade beneficiaria da subvención.

Non se poderá imputar á subvención o importe do IVE das facturas achegadas salvo que a entidade acredite que está exenta de presentar a declaración do IVE. As facturas emitidas por



Venres, 22 de maio de 2026

Núm. 96

profesionais levarán a pertinente retención do IRPF. A entidade deberá presentar os xustificantes que acrediten o ingreso en Facenda das retencións incluídas nas facturas achegadas, salvo que esas retencións no se imputen á subvención.

d) Memoria final da actividade deportiva da entidade que acredite o cumprimento da actividade subvencionada na tempada de referencia facendo especial fincapé nos aspectos cuantitativos e cualitativos da promoción do deporte feminino (competicións nas que participou cada un dos equipos da entidade con licenzas femininas ou, de ser o caso, as deportistas individuais, resultados obtidos, ámbito e nivel acadado nas competicións, material gráfico impreso, valoración sobre o impacto de xénero na súa modalidade deportiva, mencionando especialmente as actividades e logros realizados por mulleres e as necesidades detectadas...).

e) No caso de xustificar a axuda concedida con gastos para equipamento, este equipamento deberá levar o logo do Concello de Vigo. A entidade achegará fotografías do dito equipamento, sen menoscabo doutras comprobacións que realice o Servizo de Igualdade.

f) Acreditación da publicidade dada ao carácter público do financiamento da actividade subvencionada. As entidades beneficiarias deben dar publicidade do carácter público do financiamento das actividades subvencionadas facendo constar, nun lugar destacado dos diferentes soportes, o logotipo do Concello de Vigo.

g) Calquera outra documentación que lle sexa solicitada polo Concello de Vigo en relación coa xustificación da subvención.

#### 4.- Información complementaria

Non se admitirán facturas que non reúnan as condicións previstas no Real Decreto 1619/2012, do 30 de novembro, polo que se aproba o Regulamento polo que se regulan as obrigas de facturación.

Atendendo á especificidade da modalidade deportiva, aqueles gastos relacionados con arbitrxes, taxas oficiais das federacións deportivas e outros conceptos análogos poderán xustificarse a través de documentos emitidos polas federacións ou pola propia entidade deportiva: certificados de ingreso nas federacións, documentos de pago de arbitrxes, documentos de pago de premios deportivos, gastos de desprazamento das deportistas e do persoal técnico, etc. Estes documentos deberán recoller adecuadamente os datos fiscais das partes, as achegas económicas, as retencións obrigatorias de ser o caso, e demais datos que xustifiquen o valor probatorio do gasto en base á eficacia do mesmo.

En relación coa xustificación do gasto polo uso das instalacións deportivas municipais do Concello de Vigo será suficiente o documento emitido polo Concello de Vigo, acreditativo dos ingresos por eses conceptos, sempre e cando este mesmo importe non fose tido en conta para xustificar a subvención concedida na convocatoria específica de subvencións do Servizo de Deportes do Concello. O Servizo de Igualdade solicitará información ao respecto ao Servizo de Deportes.



Venres, 22 de maio de 2026

Núm. 96

Os gastos de viaxes, aloxamentos e comidas deberán corresponder ás deportistas femininas (inclúese o persoal técnico ou adestrador) e xustificarse por desprazamento para as actividades deportivas de competición e/ou clasificación. No caso dos gastos de comidas, os xustificantes que se presenten deberán indicar o menú, o prezo por menú e o prezo total. En todo caso, están excluídas as bebidas alcohólicas de calquera tipo.

Nas subvencións concedidas a entidades dependentes ou relacionadas coa Universidade, a xustificación poderá consistir na certificación da Intervención ou órgano que teña atribuídas as facultades de control da toma de razón en contabilidade e do cumprimento da finalidade para a que foron concedidas.

Excepcionalmente, cando teña que achegar arquivos multimedia para xustificar a subvención, a beneficiaria deberá presentar presencialmente na Oficina de Asistencia en Materia de Rexistro (OAR) do Concello de Vigo o soporte informático (pendrive, etc.) que conteña os ditos arquivos.

Deberase ter en conta o establecido na base segunda desta convocatoria respecto dos gastos que teñen a condición de subvencionables e non subvencionables.

#### **DÉCIMO SEXTA.- COMPROBACIÓN DAS SUBVENCIONES**

A axeitada xustificación da subvención, a realización da actividade subvencionada e o cumprimento da finalidade que determinou a concesión da axuda serán comprobadas polo Servizo de Igualdade. A xefa do Servizo de Igualdade emitirá informe ao respecto no que fará constar, de ser o caso, todas aquelas circunstancias que poidan resultar relevantes para considerar incumplida ou defectuosamente cumprida a actividade subvencionada e a xustificación achegada.

#### **DÉCIMO SÉTIMA.- OBRIGA DE INFORMACIÓN**

A beneficiaria debe facilitar toda a información que lle sexa requirida polo Servizo de Igualdade, a Intervención Xeral Municipal, o Tribunal de Contas ou o Consello de Contas no exercicio das súas funcións de fiscalización e control do destino das subvencións.

#### **DÉCIMO OITAVA.- PAGAMENTO**

Con carácter previo ao pagamento da subvención, a beneficiaria debe acreditar estar ao corrente no cumprimento das súas obrigas fiscais e coa Seguridade Social e non ser debedora por resolución de procedencia de reintegro. Esta acreditación farase mediante unha declaración responsable segundo permite o art. 31.7.e) da Lei 9/2007 de subvencións de Galicia. Esta declaración responsable tópase incluída no anexo VI, que a beneficiaria debe presentar cuberto e asinado na fase de xustificación.

O pagamento das subvencións efectuarase mediante transferencia bancaria, despois de que a subvención concedida sexa correctamente xustificada.

Procederase ao pagamento parcial ou á redución proporcional do importe da axuda nos seguintes casos:



Venres, 22 de maio de 2026

Núm. 96

- Cando a entidade certifique no anexo VI un custo total final da actividade deportiva na tempada de referencia inferior ao 100 % do orzamento que indicou no anexo III. Neste caso, a axuda será minorada proporcionalmente.
- Obtención de maiores ingresos ou maior financiamento do previsto.
- Incumprimento pola entidade beneficiaria das súas obrigas.

Estas subvencións son compatibles con calquera tipo de axuda concedida por administracións ou entes públicos ou privados. Toda alteración das condicións tidas en conta para a concesión da subvención e, en todo caso, a obtención concorrente doutras axudas, poderá dar lugar á modificación da resolución de concesión xa que o importe da subvención, en ningún caso, pode ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada (artigo 17.3 da Lei 9/2007 de subvencións de Galicia e artigo 19.3 da Lei 38/2003 xeral de subvencións).

A resolución-liquidación da axuda co pagamento parcial ou proporcional correspondente, será competencia da concelleira da Área de Goberno de Patrimonio Histórico, Cultura e Igualdade.

## **DÉCIMO NOVENA.- PERDA DO DEREITO AO COBRO. NULIDADE E REINTEGRO DAS SUBVENCIONS. RÉXIME DE INFRACCIÓNS E SANCIONS**

### 1.- Perda do dereito ao cobro

Dará lugar á perda do dereito ao cobro total ou parcial da subvención o incumprimento por parte da beneficiaria de calquera das obrigas previstas nestas bases reguladoras, especialmente, das obrigas ás que se condiciona o pagamento único da subvención, o incumprimento dos requisitos, condicións e demais circunstancias que determinaron o outorgamento da subvención, a variación da finalidade da actuación, a falta de xustificación da subvención ou a insuficiencia desta e a concorrencia dalgunha das causas previstas no artigo 33 da Lei de subvencións de Galicia (art. 31.5 da citada Lei).

En ningún caso, o importe da subvención poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada. No caso de superalo, procederá a redución da subvención, coa conseguinte perda do dereito ao cobro ou, no seu caso, o reintegro do exceso da subvención sobre o custo da actividade subvencionada, así como a esixencia dos xuros de demora correspondente.

A comunicación destas circunstancias ao Concello efectuarase no momento en que se coñeza e, en todo caso, con anterioridade á xustificación da aplicación dada aos fondos recibidos.

### 2.- Nulidade e reintegro

En canto ás causas de nulidade e anulabilidade da resolución de concesión e denegación e de reintegro das axudas estarase ao disposto nos artigos 32 e 33 da Lei 9/2007, do 13 de xuño, de subvencións de Galicia.



Venres, 22 de maio de 2026

Núm. 96

Nos casos do artigo 33 da Lei de subvencións de Galicia, procederá o reintegro das cantidades percibidas e a esixencia dos xuros de demora desde o momento do aboamento da subvención ata a data na que se acorde a procedencia do reintegro.

### 3.- Infraccións e sancións

Con respecto ás infraccións e ás sancións en que poidan incorrer as entidades beneficiarias destas axudas e ao procedemento sancionador, aplicarase o disposto no título IV da Lei 9/2007, do 13 de xuño, de subvencións de Galicia e na Lei 39/2015, do 1 de outubro, do procedemento administrativo común das administracións públicas.

## VIXÉSIMA.- TRATAMENTO DE DATOS DE CARÁCTER PERSOAL

Os datos das entidades solicitantes e os das súas representantes serán incorporados aos ficheiros municipais. A finalidade da súa recollida é a instrución do procedemento para a concesión das subvencións obxecto destas bases reguladoras, a práctica das publicacións, comunicacións e notificacións de obrigado cumprimento, o seguimento e a comprobación da actividade subvencionada e as demais actuacións previstas na Lei de subvencións de Galicia co fin de concluír o procedemento subvencional, polo que a súa achega é obrigatoria.

O Concello de Vigo ten a condición de responsable do tratamento deses datos e asume todas as obrigas derivadas do Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e demais disposicións vixentes na materia.

A lexitimación do tratamento deses datos está baseada no consentimento expreso das persoas interesadas en participar no procedemento e no exercicio lexítimo das competencias legais do Concello de Vigo no ámbito do fomento e da promoción da igualdade conforme a normativa de réxime local e sectorial aplicable.

O prazo de conservación dos datos facilitados será o necesario para a completa finalización do procedemento, incluído o prazo de prescrición para os efectos de posibles responsabilidades derivadas da actividade ou do dito tratamento.

Os datos poderán ser cedidos a outras administracións públicas cando sexa necesario para a correcta prestación do servizo ou ben en cumprimento dun mandato legal ou xudicial. Tamén poderán ser verificados e cotexados con outros que dispoñan as demais administracións a fin de comprobar a súa exactitude e veracidade.

As persoas interesadas poderán exercer os dereitos de acceso, rectificación, supresión, oposición, limitación do tratamento e portabilidade, así como opoñerse á toma de decisións individuais automatizadas, incluída a elaboración de perfís, na forma prevista na normativa vixente, ante o órgano responsable do ficheiro (Concello de Vigo). Así mesmo, teñen dereito a presentar unha reclamación ante a Axencia Española de Protección de Datos ([www.aepd.es](http://www.aepd.es)).



Venres, 22 de maio de 2026

Núm. 96

Pódese obter máis información na páxina web municipal ou contactando co delegado de protección de datos no enderezo [dpd.vigo@vigo.org](mailto:dpd.vigo@vigo.org).

## VIXÉSIMO PRIMEIRA.- NORMATIVA DE APLICACIÓN

Estas subvencións rexeranse pola Lei 9/2007, do 13 de xuño, de subvencións de Galicia; polos preceptos básicos da Lei 38/2003, do 17 de novembro, xeral de subvencións e do Real Decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións; pola lexislación básica en materia de réxime local e de procedemento administrativo común; polo Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e demais disposicións vixentes na materia; polos preceptos non básicos da Lei 38/2003 e do Real Decreto 887/2006; polas bases de execución do orzamento do Concello de Vigo do exercicio 2026 e polo Plan Estratéxico de Subvencións do Concello de Vigo 2024-2026; polas restantes normas de dereito administrativo e, no seu defecto, polas normas de dereito privado.

## VIXÉSIMO SEGUNDA.- RECURSOS


Contra estas bases e as resolucións administrativas que se adopten na súa execución cabe interpoñer recurso potestativo de reposición ante o mesmo órgano que as ditou no prazo dun mes (artigos 123 e 124 da LPAC) ou, directamente, recurso contencioso-administrativo ante os xulgados do contencioso-administrativo de Vigo (artigo 46 da Lei 29/1998, do 13 de xullo, reguladora da xurisdición contencioso-administrativa) no prazo de dous meses. Os prazos contaránse a partir do día seguinte ao da notificación ou publicación ou desde o seguinte a aquel no que se produza a desestimación por silencio administrativo, conforme establece o artigo 30.4 LPAC.

O recurso de reposición entenderase desestimado se transcorrese o prazo máximo sen terse notificado a resolución expresa. Non se poderá interpoñer recurso contencioso-administrativo ata que se resolva expresamente ou se produza a desestimación por silencio administrativo do recurso de reposición interposto.



Venres, 22 de maio de 2026

Núm. 96

<b>CONCELLO DE VIGO</b>		<b>SUBVENCÍONS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<b>ANEXO I. SOLICITUDE DE SUBVENCIÓN (Páxina 1 de 2)</b>		

**Datos da entidade solicitante**

Nome:			
CIF:		Tel. 1:	
		Tel. 2:	
Enderezo:			Código postal:

**Datos da persoa representante da entidade**

Nome e apelidos:			DNI:	
Enderezo:			Código postal:	
Tel. 1:		Tel. 2:		E-mail:
Cargo que ocupa:				

**Modalidade/s deportiva/s para a/s que solicita a subvención (deberá indicar nome e tempada de cada unha das modalidades deportivas)**

Modalidade deportiva 1			
Nome:		Tempada:	<input type="checkbox"/> 2025/2026 <input type="checkbox"/> 2026
Modalidade deportiva 2			
Nome:		Tempada:	<input type="checkbox"/> 2025/2026 <input type="checkbox"/> 2026
Modalidade deportiva 3			
Nome:		Tempada:	<input type="checkbox"/> 2025/2026 <input type="checkbox"/> 2026

**Datos para efectos de notificación**

Todas as notificacións realizaranse por medios electrónicos. Enviaranse avisos da posta á disposición da notificación ao correo electrónico e/ou teléfono móbil facilitados a continuación. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida:


Correo electrónico:       Teléfono móbil:

**SOLICITA** unha subvención por importe de:  (mínimo de 200 € e máximo de 1.500 €) pola actividade de fomento do deporte feminino que desenvolve a entidade durante a tempada deportiva 2025/2026 ou do ano 2026 no caso das modalidades deportivas cuxa tempada se corresponda co ano natural.



Venres, 22 de maio de 2026

Núm. 96

<b>CONCELLO DE VIGO</b>		<b>SUBVENCIÓNS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<b>ANEXO I. SOLICITUDE DE SUBVENCIÓN (Páxina 2 de 2)</b>		

**Documentación que se achega coa solicitude:**

- ANEXO II. CERTIFICADO DA FEDERACIÓN
- ANEXO III. ORZAMENTO EQUILIBRADO DE INGRESOS E GASTOS
- ANEXO IV. DECLARACIÓN RESPONSABLE
- ANEXO V. CERTIFICADO DA COMPOSICIÓN DA ACTUAL XUNTA DIRECTIVA
- Código de identificación fiscal
- Certificado da titularidade da conta bancaria con data de expedición do ano 2026
- Memoria das actividades que desenvolve a entidade na tempada de referencia, facendo especial fincapé nos aspectos cuantitativos e cualitativos da promoción do deporte feminino
- Outra documentación, especificar:

**Protección de datos:**

O Concello de Vigo ten a condición de responsable dos datos comunicados pola entidade e asume todas as obrigas derivadas do Regulamento (UE) 2016/679 – RXPD do Parlamento Europeo e do Consello sobre protección de datos de carácter persoal e das demais disposicións vixentes nesta materia.

A lexitimación do tratamento deses datos está baseada no consentimento expreso das persoas interesadas en participar no procedemento e no exercicio lexítimo das competencias legais do Concello de Vigo no ámbito do fomento e promoción da igualdade, conforme coa normativa de réxime local e sectorial aplicable.

O prazo de conservación dos datos facilitados será o necesario para a completa finalización do procedemento, incluído o prazo de prescrición a efectos de posibles responsabilidades derivadas da actividade ou do dito tratamento.

Os datos poderán ser cedidos a outras Administracións públicas cando sexa necesario para a correcta prestación do servizo ou ben en cumprimento dun mandato legal ou xudicial. Tamén poderán ser verificados e cotexados con calquera outros dos que as demais Administracións dispoñan a fin de comprobar a súa exactitude e veracidade.

As persoas interesadas poderán exercer os dereitos de acceso, rectificación, supresión, oposición, limitación do tratamento e portabilidade, así como opoñerse á toma de decisións individuais automatizadas, incluída a elaboración de perfís, na forma prevista na normativa vixente, perante o órgano responsable do ficheiro (Concello de Vigo). Así mesmo, teñen dereito a presentar unha reclamación perante a Axencia Española de Protección de Datos ([www.aepd.es](http://www.aepd.es)).

Poderán obter máis información na web municipal ou contactando co delegado de protección de datos no enderezo [dpd.vigo@vigo.org](mailto:dpd.vigo@vigo.org).


Vigo,  de  de 2026

Sinatura electrónica da presidencia



Venres, 22 de maio de 2026

Núm. 96

<b>CONCELLO DE VIGO</b>		<b>SUBVENCIÓNS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<b>ANEXO II. CERTIFICADO DA FEDERACIÓN</b>		

Dona/Don:		DNI:	
Secretaria/o da Federación de:		CIF:	

**CERTIFICA** que son certos os datos que a continuación se detallan en relación á actividade deportiva da entidade que se indica na tempada deportiva **2025/2026** ou do ano **2026** naquelas modalidades deportivas cuxa tempada se corresponda co ano natural:

Nome da entidade:		CIF:	
-------------------	--	------	--

Modalidade deportiva:	
-----------------------	--

Tempada deportiva: (Indicar só unha das posibilidades)	<input type="checkbox"/> 2025/2026	<input type="checkbox"/> 2026
---	------------------------------------	-------------------------------

Datos oficiais do calendario de competicións da modalidade deportiva (indicar mes e ano):	INICIO COMPETICIÓNS		FINALIZACIÓN COMPETICIÓNS	
	Mes	Ano	Mes	Ano

LICENZAS DEPORTISTAS DE TODO O CLUB Categorías	NÚM. DE LICENZAS		Ámbito da competición regular*
	Femininas	Masculinas	

\* Especificar se o ámbito da competición é local, autonómico, nacional ou internacional durante a fase regular da competición. No caso de que unha mesma licenza compita en varios ámbitos, indicar só o superior. Se non compite, indicar: NON COMPITE

LICENZAS PERSOAL TÉCNICO	NÚM. DE LICENZAS	
	Femininas	Masculinas
PERSOAL ADESTRADOR		
PERSOAL TÉCNICO		
PERSOAL DELEGADO		
OUTROS		



\_\_\_\_\_, \_\_\_\_ de \_\_\_\_\_ de 2026

Sinatura da Secretaría da Federación	Sinatura da Presidencia da Federación
--------------------------------------	---------------------------------------



Venres, 22 de maio de 2026

Núm. 96

		<b>SUBVENCIÓNS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<b>ANEXO III. ORZAMENTO EQUILIBRADO DE INGRESOS E GASTOS</b>		

Dona/Don:		DNI:	
Secretaria/o da entidade deportiva:		CIF:	

Certifica que o orzamento de ingresos e de gastos previstos para a tempada 2025/2026 ou do ano 2026 se a tempada deportiva se corresponde co ano natural, é o seguinte:

INGRESOS	
CONCEPTO	IMPORTE
Ingresos persoas asociadas	
Ingresos patrocinios privados	
Concello de Vigo. Área de Igualdade	
Concello de Vigo. Área de Deportes	
Fundación Deporte Galego	
Deputación de Pontevedra	
Outros ingresos, especificar:	
Outros ingresos, especificar:	
TOTAL INGRESOS PREVISTOS	
A contía total de ingresos deberá coincidir coa contía total de gastos.	

GASTOS	
CONCEPTO	IMPORTE
Gastos federativos (licenzas e mutualidades)	
Gastos material	
Gastos desprazamentos	
Gastos alugueiro instalacións	
Outros gastos, especificar:	
Outros gastos, especificar:	
Outros gastos, especificar:	
TOTAL GASTOS PREVISTOS	
A contía total de gastos deberá coincidir coa contía total de ingresos.	

**O orzamento que se reflicta neste anexo terase en conta na fase de xustificación, procedendo a minorar proporcionalmente o importe da axuda concedida no caso de que a entidade declare un gasto total final na tempada de referencia inferior ao 100% do orzamento indicado neste anexo.**



Vigo,  de  de 2026

Sinatura da secretaria	Sinatura electrónica da presidencia
------------------------	-------------------------------------



Venres, 22 de maio de 2026

Núm. 96

		<b>SUBVENCIONS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<i>ANEXO IV. DECLARACIÓN RESPONSABLE</i>		

Dona/Don:		DNI:	
Secretaria/o da entidade deportiva:		CIF:	

**DECLARA**

1.- Que dona/don  con DNI:  ten a condición de representante legal desta entidade.

2.- Que, para a tempada deportiva 2025-2026 ou do ano 2026 no caso de que a tempada deportiva se corresponda co ano natural, esta entidade:

- NON solicitou nin se lle concederon outras axudas ou subvencións
- SI solicitou ou se lle concederon outras axudas ou subvencións

Entidade á que se lle solicitou e/ou que concedeu a axuda	Importe solicitado	Importe concedido

3.- Que a entidade solicitante coñece e acepta as bases reguladoras das subvencións do Servizo de Igualdade a entidades deportivas para a promoción do deporte feminino do ano 2026.

4.- Que a entidade solicitante comparte co Concello de Vigo o obxectivo da promoción do deporte feminino e se compromete a empregar unha linguaxe e imaxe non sexista no desenvolvemento da súa actividade.

5.- Que a entidade está ao corrente no cumprimento das obrigas tributarias coa Axencia Tributaria, a Consellería de Facenda da Xunta de Galicia e o Concello de Vigo, e das obrigas coa Seguridade Social e autoriza ao Concello de Vigo ás comprobacións que sexan necesarias.

6.- Que a entidade solicitante non está incurso en ningunha das prohibicións para obter a condición de beneficiaria previstas nos apartados 2 e 3 do artigo 10 da Lei 9/2007, do 13 de xuño, de subvencións de Galicia e que son certos os datos declarados.


Vigo,  de  de 2026

Sinatura da secretaria	Sinatura electrónica da presidencia
------------------------	-------------------------------------



Venres, 22 de maio de 2026

Núm. 96

<b>CONCELLO DE VIGO</b>		<b>SUBVENCIÓNS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<i>ANEXO V. CERTIFICADO DA COMPOSICIÓN DA ACTUAL XUNTA DIRECTIVA</i>		

Dona/Don:		DNI:	
Secretaria/o da entidade deportiva:		CIF:	

**CERTIFICO**Que a actual xunta directiva da entidade está integrada por un total de  persoas:

- mulleres
- homes

Que a actual xunta directiva da entidade está formada polas seguintes persoas:

PRESIDENTA/E:

VICEPRESIDENTA/E:

SECRETARIA/O:

TESOUREIRA/O:

VOGAIS:


Vigo,  de  de 2026

Sinatura da secretaría	Sinatura electrónica da presidencia
------------------------	-------------------------------------



Venres, 22 de maio de 2026

Núm. 96

<b>CONCELLO DE VIGO</b>		<b>SUBVENCIÓNS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<b>ANEXO VI. SOLICITUDE DE PAGAMENTO</b>		

Dona/Don:		DNI:	
Secretaria/o da entidade deportiva:		CIF:	

co conforme da/o representante legal

Dona/Don:		DNI:	
-----------	--	------	--

**CERTIFICO**

Que a actividade deportiva subvencionada por acordo da Xunta de Goberno local de data [.....] realizouse nas condicións previstas e segundo as características que se declararon na solicitude de subvención, o que se acredita coa conta xustificativa que se achega.

**DECLARO**

- Que todos os datos que contén a CONTA XUSTIFICATIVA se axustan á realidade e cumpren coas bases reguladoras da subvención obxecto da solicitude.
- Que o importe da subvención concedida é de [.....] € e que a actividade que foi obxecto da subvención foi executada na súa totalidade.
- Que o gasto total final da entidade na tempada de referencia é de [.....] € (cando este gasto total final sexa inferior ao 100 % do orzamento que a entidade indicou no anexo III, procederá a minorar proporcionalmente a axuda concedida).
- Que os gastos que se imputan á subvención aplicáronse á actividade subvencionada co obxecto de promover o deporte feminino.
- Que a entidade non percibiu ningún outro ingreso, axuda nin subvención para a actividade subvencionada ou, no caso contrario, que as achegas obtidas non superaron o custo total da dita actividade.
- Que a entidade está ao corrente no cumprimento das súas obrigas tributarias e das obrigas coa Seguridade Social, que non é debedora por resolución de procedencia de reintegro e que foi practicada a pertinente retención do Imposto sobre a renda das persoas físicas sobre os gastos que están suxeitos a retención, así como que esta foi ou será declarada, liquidada e ingresada na Axencia Estatal da Administración Tributaria (no caso de que impute as ditas retencións á subvención concedida).
- Que a entidade ten solicitadas e/ou concedidas as seguintes axudas para o desenvolvemento da actividade subvencionada:

Entidade á que se lle solicitou e/ou que concedeu a axuda	Importe solicitado	Importe concedido

8. Que a entidade:

está exenta de presentar declaración do IVE e o importe do IVE das facturas que se achegan para xustificar a subvención concedida é asumido pola entidade beneficiaria ao non poder deducilo.

non está exenta de presentar declaración do IVE.

**SOLICITO** o pago da liquidación correspondente da axuda concedida.


Vigo, [ ] de [ ] de 2026

Sinatura da secretaria	Sinatura electrónica da presidencia
------------------------	-------------------------------------



Venres, 22 de maio de 2026

Núm. 96

<b>CONCELLO DE VIGO</b>		<b>SUBVENCIONS DO SERVIZO DE IGUALDADE A ENTIDADES DEPORTIVAS PARA A PROMOCIÓN DO DEPORTE FEMININO DO ANO 2026</b>
<i>ANEXO VII. RELACIÓN DE FACTURAS E XUSTIFICANTES QUE SE IMPUTAN Á SUBVENCIÓN CONCEDIDA</i>		

Núm. factura	Data	Provedor/a	CIF/NIF provedor/a	Concepto	Importe total factura/ xustificante	Importe que se imputa á subvención
<b>IMPORTE TOTAL IMPUTADO Á SUBVENCIÓN</b>						

A/o tesoureira/o :	Dona/don:	DNI:	
Da entidade deportiva:		CIF:	

**CERTIFICA** que as facturas e os xustificantes que se relacionan neste anexo polo IMPORTE TOTAL IMPUTADO Á SUBVENCIÓN DE  corresponden a gastos vinculados directamente coa actividade de fomento do deporte feminino e coa organización de actividades deportivas dos equipos con licenzas femininas e das deportistas femininas.

Vigo,  de  de 2026

Sinatura da tesourería	Sinatura electrónica da presidencia
------------------------	-------------------------------------

(Este anexo cubrirase tantas veces como sexan necesarias para completar a conta xustificativa)

